

ADMINISTRACIÓN LOCAL

PROVINCIAL

DEPUTACIÓN PROVINCIAL DA CORUÑA

Servizo de Acción Social, Cultural e Deportes. Sección de Educación, Cultura e Deportes

RP 2022/25029.- Aprobación modificación bases convocatoria Premio Otero Pedrayo 2022

Por resolución da Presidencia nº 2022/25029, de 24 de maio, modificouse a resolución nº 2022/5421, de 31 de xaneiro, de aprobación das Bases da convocatoria do Premio “Otero Pedrayo 2022”, co obxecto de corrixir o erro material na base 5ª da convocatoria no relativo á composición do xurado, polo que o texto modificado das bases é o seguinte:

BASES REGULADORAS DO PREMIO “OTERO PEDRAYO 2022”

1. Convocatoria

1.1. Convócase o Premio “Otero Pedrayo 2022”, dotado con dezaseis mil euros (16.000,00 €), segundo as disposicións do regulamento correspondente.

1.2. Esta convocatoria corresponde ao ano 2022, de acordo co disposto no regulamento, no que se establece o seu ámbito autonómico e o seu carácter anual; convócaa cada ano unha das deputacións provinciais da Coruña, Lugo, Ourense e Pontevedra, por esta mesma orde.

1.3. Atendendo ás razóns expostas, a convocatoria e concesión do premio, na edición de 2022, atribúeselle á Deputación Provincial da Coruña, que consigna na partida 0612/3341/22609 do seu Orzamento de gastos o importe do premio e os gastos correspondentes á súa organización, e no de ingresos, as sumas que deberán achegar as demais deputacións de Galicia, cotitulares do premio, cunha contía de 2.000,00 € cada unha delas e a Xunta de Galicia, cunha achega de 8.000,00 €.

2. Obxecto do premio

O premio “Otero Pedrayo” ten por obxecto:

- * Perpetuar e honrar a memoria da persoa egrexia no campo das letras e do coñecemento.
- * Premiar un labor que constituía unha contribución eminente á cultura galega.
- * Promover os valores propios de Galicia e as obras que leven ao esclarecemento e á mellora da súa cidadanía e institucións.

3. Persoas candidatas

3.1. Poderán optar ao premio:

- * As persoas naturais nadas ou residentes en Galicia ou con cumprida raizame nela.
- * Os grupos de traballo radicados en Galicia ou constituídos para promover a cultura galega.
- * As personalidades ou institucións que se caractericen pola difusión e polo mantemento da cultura galega.

3.2. A opción ao premio determinarase por unha candidatura, que poderá ser feita por:

- * Calquera persoa física ou xurídica das sinaladas no apartado 3.1., respecto de si mesmas.
- * As entidades académicas e culturais galegas respecto dos seus membros.
- * Calquera dos presidentes das deputacións provinciais de Galicia, a proposta das respectivas comisións de Cultura.
- * A Xunta de Galicia, oída a Consellería correspondente.
- * O mesmo xurado, xa constituído.

4. Tramitación

4.1. A presentación de candidaturas ao premio deberá realizarse preferentemente por medios electrónicos a través do modelo “solicitud xeral” dispoñible na sede electrónica da Deputación da Coruña (<https://sede.dacoruna.gal>).

Para a presentación da inscrición, a sede electrónica da Deputación da Coruña admite os certificados electrónicos do sistema Cl@ve, que contempla a utilización de sistemas de identificación baseados en claves concertadas (sistemas de usuario e contrasinal) e certificados electrónicos (incluído o DNle).

Opcionalmente, poderá presentarse a inscrición de forma presencial en calquera dos lugares e rexistros establecidos na normativa reguladora do procedemento administrativo común.

4.2. O prazo para a presentación de candidaturas será de tres meses, a partir do día seguinte ao da publicación desta convocatoria no BOP da Coruña. Esta publicación realizarase tamén nos boletíns oficiais das provincias da Lugo, Ourense e Pontevedra, no DOG e nos diarios de máis difusión da comunidade autónoma.

4.3 Xunto co formulario de presentación de candidaturas as persoas interesadas deberán achegar a seguinte documentación:

- * Recensión biográfica da persoa ou agrupación que aspira ó premio.
- * Documentos e antecedentes que se consideren de interese para o coñecemento da súa dimensión literaria ou científica.
- * Cinco exemplares do texto do traballo co que se opta ao premio, no caso de que a proposta se basee nunha obra ou produción singular concreta (un único exemplar se se presenta por sede electrónica).
- * No caso de agrupacións e institucións, un exemplar do regulamento ou estatutos polos que se rexan e unha relación das tarefas levadas a cabo en relación co obxecto do premio.

4.4. A presentación da candidatura determina a aceptación íntegra das condicións desta convocatoria e das contidas no regulamento do premio.

4.5. Todos os trámites administrativos que as persoas interesadas deban realizar durante a tramitación deste procedemento faranse preferentemente por medios electrónicos a través do modelo “solicitude xeral”, dispoñible na sede electrónica da Deputación da Coruña (<https://sede.dacoruna.gal>), ou presencialmente en calquera dos lugares e rexistros establecidos na normativa reguladora do procedemento administrativo común.

4.6 No caso de que a solicitude non reúna os datos exixidos ou calquera dos previstos no artigo 66 da LPACAP, requiríraselle á persoa interesada que emende as faltas ou presente os documentos preceptivos no prazo de 10 días hábiles e indicáraselle que, de non o facer, considerárase desistida a súa petición, que se arquivará sen máis trámites.

4.7 Unha vez rematado o prazo ao que se refire o apartado 4.2. a Secretaría da Deputación da Coruña expedirá unha certificación das propostas presentadas que, xunto con elas e coa documentación correspondente, pasarán ao xurado do premio, para que todos os membros as coñezan con antelación suficiente á reunión de deliberación.

4.8. A cada solicitude ou proposta xuntaráselle cantos documentos se consideren de interese para o mellor coñecemento do/a candidato/a.

5. Xurado e actuacións

5.1. Para adxudicar este premio constituirase un xurado integrado por:

- * Presidencia, o Presidente da Xunta de Galicia ou persoa en quen delegue.
- * Vicepresidencia, a persoa titular da presidencia da deputación que convoca o premio, que este ano lle corresponde á Deputación da Coruña, ou persoa en quen delegue.
- * Vogais:
 - Os presidentes das tres deputacións restantes, ou persoas nas que deleguen.
 - O presidente da Comisión de Cultura da Deputación que convoca, ou persoa en quen delegue.
 - O conselleiro de Cultura da Xunta de Galicia, ou persoa en quen delegue.
 - Unha persoa representante de cada un dos seguintes organismos:
 - a) Universidade de Santiago de Compostela
 - b) Universidade de Vigo
 - c) Universidade da Coruña
 - d) Real Academia Galega
 - e) Instituto “Padre Sarmiento” de Estudos Galegos
 - f) Fundación “Otero Pedrayo”

• Cinco persoas de recoñecida autoridade científica e literaria, designadas pola Xunta de Galicia e de cada unha das deputacións.

Procurarase a paridade de xéneros nos membros do xurado.

* Secretaría, con voz e sen voto, a Secretaria da Deputación da Coruña, ou persoa en quen delegue.

5.2. O xurado constituído emitirá o seu ditame no mes seguinte ao día no que remate o prazo de presentación de candidaturas, e a súa actuación suxeitarase ao disposto nos artigos 4.2 a 4.6 do regulamento do premio.

5.3. Da actuación do xurado e da adxudicación do premio redactarase unha acta detallada que, asinada polos seus membros e coa totalidade das documentacións presentadas, pasará a coñecemento do Pleno da Deputación convocante na primeira sesión que teña lugar.

5.4. A copia da acta e dos demais antecedentes que cumpran para o coñecemento da tramitación do premio remitirán-selles ás deputacións da Lugo, Ourense e Pontevedra.

6. Entrega do premio

Realizarase no lugar e na data que determine o presidente da Deputación da Coruña, nun acto solemne e coa asistencia dos/as membros da Corporación provincial e do xurado, así como de personalidades das artes, letras e ciencias da comunidade autónoma.

Xunto co premio, a persoa ou entidade galardoada recibirá unha copia da acta da reunión do xurado.

7. Normas supletorias

No que non estea previsto expresamente nestas bases, o xurado e a Deputación convocante terán en conta as normas contidas no regulamento do premio e nos xerais do funcionamento da Corporación provincial, así como na lexislación vixente.

8. Protección de datos

Os datos subministrados teñen a finalidade de poder tramitar esta convocatoria e están protexidos pola Lei Orgánica 3/2018, de 5 de decembro de Protección de Datos Persoais e garantía dos dereitos dixitais.

O responsable do tratamento dos datos é a Deputación Provincial da Coruña, e o encargado será a empresa contratada pola Deputación Provincial para coordinar o premio, no caso de se contratar.

A lexitimación para o tratamento dos datos persoais contidos nesta solicitude é o consentimento que o asinante outorga á Deputación Provincial coa súa firma. No caso de que sexa denegado o consentimento para o tratamento dos datos persoais, non poderá presentarse ao premio por imposibilidade de tramitación da solicitude.

O destinatario dos datos é a Deputación Provincial que non cederá datos a terceiros, salvo obriga legal. Os datos facilitados conservaranse ata a finalización da tramitación da convocatoria.

As persoas que participen na convocatoria teñen os dereitos a acceder, rectificar ou suprimir datos erróneos, solicitar a limitación do tratamento dos seus datos así como opoñerse ou retirar o consentimento e solicitar a portabilidade dos mesmos en calquera momento.

Estes dereitos poderán exercerse perante as oficinas centrais da Deputación sitas na Av. Porto da Coruña, 2, 15003 A Coruña ou ben a través de medios electrónicos, dirixindo un correo ao enderezo delegadodeprotecciondedatos@dacoruna.gal. Pode consultar a política de privacidade da Deputación na dirección [//www.dacoruna.gal/avisos/politica-privacidade](http://www.dacoruna.gal/avisos/politica-privacidade).

A Coruña, 24 de maio de 2022

O presidente

Valentín González Formoso

O secretario accidental

Miguel Iglesias Martínez

2022/2986